

AAQQIISSUT

Siusinnerusukkut nassiussaq taarserpaa.

(Inatsisissatut siunnersuummi aaqqiissutaasoq nutaami nalunaarutigineqarpoq)

Uunga siunnersuut: 2019-mut aningaasanut inatsisissamut siunnersuutip akuersissutiginnissaanut killigitat sivitsorneqarneri, nuna tamakkerlugu akileraarutip procentiata aalajangersarnera, nuna tamakkerlugu immikkut akileraarut aamma 2019-imi kommunitut akileraarut kiisalu kommunini meeqqanut suli atualinngitsunut ulluunerani neqeroorutitut 2019-imi akiliuteqartarnek pillugit Inatsisartut inatsisaat nr. xx, xxx 2018-imeersoq

(Aningaasaqarnermut Nunanilu Avannarlerni suleqatigiinnermut Naalakkersuisoq)

Saqqummiussissut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerneqarnera

Aallaqqaammut Naalakkersuisut sinnerlugit, inatsisissatut siunnersuutip uuma nukingertumik suliarineqarsinnaamat, Inatsisartut qutsaviginiarpakka.

Aningaasaqarnermut Akileraartarnermullu Ataatsimiititaliap Aningaasanut Inatsisip aappassaaneerineqarnissaata kinguartinneqarnissaa qinnutigaa. Qinnuteqaat taanna assigalugu ataatsimiititaliallu aningaasanut inatsisissatut siunnersuummik piffissaqarluarnerulluni suliaqarnissaa qulakkeerniarlugu, taamatullu Aningaasaqarnermut Akileraartarnermullu Ataatsimiititaliap kaammattuuteqarneratigut, 2019-mut Aningaasanut Inatsisip akuersissutigineqarnissaanut killiliussap kinguartinneqarnissaa siunnersuutigineqarpoq.

Inatsisartut Naalakkersuisullu pillugit Inatsisartut inatsisaanni, ukiumut tulliuttumut aningaasanut inatsisissaq kingusinnerpaamik 15. november akuersissutigineqartassasoq allassimavoq. Aammattaaq Akileraartarnermut inatsimmi allassimavoq nuna tamakkerlugu akileraarutip aamma nuna tamakkerlugu immikkut akileraarutip procentii kingusinnerpaamik 15. november annertussusilerneqartassasut. Taassuma ukiumi tulliuttumi Aningaasanut inatsimmut ilanngullugu pisarnera nalinginnaasuuvoq.

Inatsisissatut siunnersuutikkut siunertarineqarpoq aningaasanut inatsisissap akuersissutigineqarnissaanut aamma nuna tamakkerlugu akileraarutip, aammalu nuna tamakkerlugu immikkut akileraarutip procentiinik annertussusiliinissamut piffissaliussap kingusinnerpaamik ulloq 26. novemberimut sivitsorneqarnissaa. Piffissaliussaq taamaaliornikkut ullut 11-t angullugit sivitsorneqassaaq.

Aningaasanulli inatsisissap akuersissutigineqarnissaanut piffissaliussaq sivitsorneqarpat tamanna aamma nunap kommuniinut sunniuteqassaaq. Akileraartarnermut inatsimmi allassimavoq ukiumi tulluuttumi kommuninut akileraarutit kingusinnerpaamik 1. december annertussusilerneqarsimassasut. Kommunit aammattaaq ukiumi tulluuttumi missingersuutit kingusinnerpaamik 1. december akuersissutigereertussaavaat.

Taamaammat inatsisissatut siunnersuutip aamma siunertaraa piffissaliussat taakku sivitsorneqarnissaat, taamaalillutik kommunalbestyrelsit missingersuutit suliaqarnissaminut aamma lu kommunimut akileraarummik annertussusiliinissaminut piffissaqarneroqqullugit. Matumani siunnersuutaavoq piffissaliussap 6. decemberimut sivitsorneqarnissaa.

Kiisalu siunnersuutip aamma kingunerissavaa kommunit, meeqqat suli atualinngitsut perorsaanikkut inerikkiartuutaasunik ulluunerani neqeroorutiniinnerinut akiliutinik annertussusiliinissaanut piffissaliussamik kinguartitsinissaaq. Akiliutissat taakku kingusinnerpaamik novemberip qaammataani kommunalbestyrelsinit annertussusilerneqarsimasussaagaluarput. Matumani siunnersuutaavoq piffissaliussap taamatutaaq 6. decemberimut sivitsorneqarnissaa.

Inatsisissatut siunnersuut ukiup naanerani atorunnaassaaq, tassalu 2018-iinnarmi atuutissalluni.

Naggasiullugu kalaallisoortanni inatsisip oqaasertaanut inatsimmut oqaasertaliussanut naqqiummik agguaassisoqarnera erseqqissaatigissavara. Naqqiummi § 1, imm. 4-mi kukkusumik ulluliineq aaqqinneqarpoq.

Naalackersuisut matumuuna siunnersuut Inatsisartunut inussiarnersumik suliassanngortippaat.